

Tarikh Dibaca: 08 SEPTEMBER 2017M | 17 ZULHIJJA H 1438H

KHUTBAH JUMAAT

Tajuk:

“MEMBINA KEKAYAAN JIWA”

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR



SENARAI AHLI JAWATANKUASA KHUTBAH NEGERI SELANGOR 2017

- 1. SS. Dato' Haji Haris Bin Kasim (Pengerusi)**
Pengarah Jabatan Agama Islam Selangor
- 2. SS. Dr. Haji Anhar Bin Haji Opir (Ahli)**
Timbalan Mufti, Jabatan Mufti Negeri Selangor
- 3. Tuan Haji Idris Bin Ramli (Setiausaha)**
Ketua Penolong Pengarah, Bahagian Pengurusan Masjid, JAIS
- 4. Yg. Berbahagia Dr. Haji Osman Bin Haji Sabran (Ahli)**
Pensyarah, Universiti Selangor
- 5. Dato' Haji Abdul Majid Bin Omar (Ahli)**
Ahli Jawatankuasa Fatwa Negeri Selangor
- 6. Tuan Haji Hamid Bin Md Isa (Ahli)**
Pensyarah, Kolej Universiti Islam Selangor
- 7. Tuan Haji Md. Sahari Bin Abdullah (Ahli)**
Ahli Jawatankuasa Fatwa Negeri Selangor
- 8. Tuan Haji Abdul Halem Hapiz Bin Salihin (Ahli)**
Ketua Penolong Mufti (Fatwa), Jabatan Mufti Negeri Selangor
- 9. Ustaz Muhammad Farhan Bin Wijaya (Ahli)**
Imam Besar Masjid Sultan Salahuddin Abdul Aziz Shah
- 10. Ustaz Indera Shahril Bin Mohd Shahid (Ahli)**
Pegawai Majlis Agama Islam Selangor
- 11. Ustaz Hairol Azmi Bin Khairudin (Urusetia)**
Penolong Pengarah Unit Khutbah, BPM, JAIS



“MEMBINA KEKAYAAN JIWA”

الْحَمْدُ لِلَّهِ الْقَائِلِ: هُوَ الَّذِي أَرْسَلَ رَسُولَهُ بِالْهُدَى
وَدِينِ الْحَقِّ لِيُظْهِرَهُ عَلَى الدِّينِ كُلِّهِ وَلَوْ كَرِهَ
الْمُشْرِكُونَ¹

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ
أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى
سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ
وَأَيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى:
يَا أَيُّهَا الَّذِينَ آمَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ
إِلَّا وَأَنْتُمْ مُسْلِمُونَ.

Muslimin yang dirahmati Allah sekalian,

Marilah sama-sama kita meningkatkan ketakwaan kepada Allah SWT dengan bersungguh-sungguh melaksanakan segala perintah-Nya dan meninggalkan segala larangan-Nya. Mudah-mudahan kehidupan ini mendapat keberkatan di dunia dan di akhirat.

Mimbar pada hari ini akan membicarakan khutbah bertajuk
“MEMBINA KEKAYAAN JIWA”.

¹ al-Taubah : 33



Hadirin Jumaat yang dirahmati Allah sekalian,

Harta benda yang bertimbun dan wang ringgit yang banyak tersimpan di dalam peti besi atau bank, bukanlah ukuran bagi meletakkan seseorang itu diiktiraf sebagai orang kaya, meskipun masyarakat menggelarkannya sebagai jutawan. Siangnya dihambat kesibukan mengurus harta, malanya pula sukar meletakkan mata kerana keluh kesah menghitung untung rugi. Si kaya sedar bahawa tidak sebesar mana harta yang diperlukan untuk menampung keperluan hidup sekeluarga, malah kadang kala terbatas makan minumannya kerana penyakit yang bersarang di dalam tubuh.

Pada sisi yang lain pula, ada insan yang hatinya resah memikirkan bagaimana untuk mencari sesuap nasi menyara keluarga, makan pakai anak-anak yang sedang membesar. Si miskin terus dilanda resah kerana kesempitan hidup yang semakin menghimpit.

Ramai orang kaya yang hatinya tidak tenteram, si miskin apatah lagi, lalu apakah yang membezakan antara yang kaya dan miskin jika keduanya dilanda gundah gulana dan resah gelisah?

Justeru nilai kekayaan pada kacamata islam tidak diukur dengan harta yang banyak tetapi ianya terletak pada jiwa. Jika jiwa seorang hamba itu merdeka dan kaya ia akan melapangkan hati dan menatijahkan kebahagiaan, sedangkan jika jiwa seseorang itu tenggelam dalam keresahan maka kekayaan yang menimbun disekelilingnya seolah olah menghimpit kehidupannya sendiri.

Konsep kekayaan yang dibawa oleh Islam membebaskan manusia daripada penjajahan pemikiran kebendaan kepada kekayaan jiwa yang membahagiakan. Seperti dalam hadith yang telah diriwayatkan oleh Abu Hurairah R.Anhu bahawa Rasulullah SAW bersabda :



لَيْسَ الْغِنَى عَنْ كَثْرَةِ الْعَرَضِ وَلَكِنَّ الْغِنَى غِنَى النَّفْسِ

"Bukanlah kekayaan itu dengan banyaknya harta tetapi kekayaan itu adalah kekayaan jiwa"

(Riwayat al-Bukhari dan Muslim.)

Muslimin yang dikasihi Allah,

Gambaran peri pentingnya soal membina jiwa dalam setiap diri insan dirakamkan oleh baginda nabi dalam hadith daripada al-Nu'man bin Basyir R.Anhu bahawa Rasulullah SAW bersabda :

أَلَا وَإِنَّ فِي الْجَسَدِ مُضْغَةً إِذَا صَلَحَتْ صَلَحَ
الْجَسَدُ كُلُّهُ، وَإِذَا فَسَدَتْ فَسَدَ الْجَسَدُ كُلُّهُ، أَلَا
وَهِيَ الْقَلْبُ

"Ketahuilah, Sesungguhnya dalam jasad seseorang itu ada segumpal darah, jika ia baik maka baiklah jasad keseluruhannya. Namun jika rosak ia, maka rosaklah jasad keseluruhannya. Ketahuilah ia adalah hati".

(Riwayat al-Bukhari dan Muslim).

Jelaslah bahawa dalam mencari penyelesaian terhadap segala masalah insan sama ada soal jasmani atau rohani bermula daripada pembentukan jiwa yang sejahtera.

Terdapat beberapa perkara yang perlu diambil perhatian dalam usaha membentuk kekayaan jiwa ini, antaranya ;

Pertama : Menjadikan Keimanan Kepada Allah Asas Kehidupan



Setiap manusia di dunia ini mempunyai sudut pandang yang berbeza dalam menilai asas kehidupan yang memandu perjalanan kehidupan mereka. Sejarah memaparkan watak insan yang menjadikan harta, pangkat dan nama sebagai matlamat kehidupan mereka seperti Qarun, Firaun dan Haman tersungkur kelembah kehinaan. Namun sejarah juga memaparkan citra gemilang hartawan berjiwa hamba seperti Saidina Uthman bin Affan dan Abdul Rahman bin Auf Radiallahu Anhuma. Mereka ini juga dikurnia nikmat yang sama, namun yang membezakan mereka dengan Qarun, Firaun dan Haman ialah asas kehidupan mereka, yang meletakkan iman kepada Allah.

Dalam amalan bersedekah misalnya, jangan kita menyangka sumbangan atau infaq mudah diperolehi daripada poket-poket hartawan. Tetapi yakinlah sedekah tersebut akan mudah diperolehi daripada poket-poket insan yang mempunyai kekayaan jiwa yang didasari keimanan kepada Allah SWT, tidak kira sama ada dalam kalangan orang miskin atau dalam kalangan hartawan.

Si miskin akan menjadi pemurah apabila jiwanya kaya, seringgit yang diinfakkan tidak sama nilainya dengan seringgit yang didermakan oleh orang yang berharta. Kerana bagi orang yang mempunyai harta yang banyak, nilai seringgit itu terlalu kecil baginya. Sebaliknya bagi yang kurang berkemampuan, mungkin nilai seringgit itu kadangkala amat besar baginya, kerana sulitnya bergelut dengan dunia untuk mendapatkan duit tersebut. Justeru, keikhlasan yang tumbuh dari keimanan kepada Allah menjadikannya dermawan yang lebih tinggi martabatnya. Sewajarnya, seorang hartawan itu perlu menjadi lebih dermawan kerana dia memiliki harta.

Firman Allah SWT dalam surah Ali- Imran ayat 14:



زَيْنَ لِلنَّاسِ حُبُّ الشَّهَوَاتِ مِنَ النِّسَاءِ وَالْبَنِينَ
وَالْقَنَاطِيرِ الْمُقَنْطَرَةِ مِنَ الذَّهَبِ وَالْفِضَّةِ وَالْخَيْلِ
الْمُسَوَّمَةِ وَالْأَنْعَامِ وَالْحَرْتَ ذَلِكَ مَتَعُ الْحَيَاةِ الدُّنْيَا
وَاللَّهُ عِنْدَهُ حُسْنُ الْمَآبِ ﴿١٤﴾

"Dihiaskan (dan dijadikan indah) kepada manusia: kesukaan kepada benda-benda yang diinginkan nafsu, iaitu perempuan-perempuan dan anak-pinak, harta benda yang banyak berpikul-pikul, dari emas dan perak; kuda yang bertanda lagi terlatih dan binatang-binatang ternak serta kebun-kebun tanaman. Semuanya itu ialah kesenangan hidup di dunia. Dan (ingatlah), pada sisi Allah ada tempat kembali yang sebaik-baiknya (iaitu Syurga)".

Para tetamu Allah sekalian,

Kedua : Sifat Qana'ah (قَنَاعَة) Menjadi Amalan

Sifat qana'ah atau merasa kecukupan merupakan suatu sifat yang mesti disematkan di dalam jiwa setiap manusia. Sifat mulia ini akan mengikis sifat tercela (mazmumah) dan menyemai sifat tekun (Itqan) dalam mencari rezeki. Natijahnya, pembaziran, bermewah-mewah dalam berbelanja dapat dikikis dalam jiwa hartawan. Bagi yang diuji dengan kemiskinan pula tidak mendorong dirinya terlibat mencari harta dengan cara mencuri, menyamun dan merompak, malah membangkitkan semangat dan kesungguhan dalam mencari rezeki yang halal serta redha atas ketentuan ilahi.

Ketiga : Mensyukuri Nikmat Kurniaan Allah



Islam melihat nikmat itu bukan hanya semata-mata kemewahan dan kedudukan yang terikat dengan pemikiran kebendaan tetapi segala kurniaan Allah kepada hambanya meliputi segala kemudahan dalam melakukan ketaatan, kesihatan, keluarga yang bahagia, anak-anak yang soleh, teman dan sahabat yang jujur, jiran tetangga yang harmoni dan sebagainya.

Apabila insan memahami konsep ini, sifat syukur itu pastinya akan dizahirkan dengan memperbanyakkan ibadah sebagai amalan kesyukuran kepada Allah SWT dan sentiasa mengekalkan baik sangka terhadap Allah SWT dan meletakkan keyakinan kepada-NYA dalam apa jua keadaan. Hartawan mahupun si miskin yang dilimpahi kekayaan jiwa pastinya akan berlumba-lumba melakukan kebaikan kerana mensyukuri nikmat Allah kepadanya.

Firman Allah SWT dalam surah Ibrahim ayat 7:

وَإِذْ تَأَذَّنَ رَبُّكُمْ لَئِنْ شَكَرْتُمْ لَأَزِيدَنَّكُمْ وَلَئِنْ كَفَرْتُمْ إِنَّ

عَذَابِي لَشَدِيدٌ ﴿٧﴾

"Dan (ingatlah) tatkala Tuhanmu memberitahu: Sesungguhnya! Jika kamu bersyukur nescaya Aku akan tambahi nikmat-Ku kepadamu dan demi sesungguhnya, Jika kamu kufur ingkar sesungguhnya azab-Ku amatlah keras".

Ayat ini menjelaskan apabila manusia itu bersyukur, maka Allah menjanjikan kepadanya penambahan nikmat serta kurniaan-Nya. Namun bagi manusia yang kufur iaitu gersang jiwanya daripada sifat syukur akan dijanjikan azab yang pedih kepada mereka.



Insan yang dikurniakan kepadanya harta, pangkat dan kedudukan yang hatinya tertanam benih keimanan dan disiram dengan ketaqwaan kepada Allah, pastinya akan lahir rasa bersyukur atas nikmat yang dimiliki. Mereka yakin bahawa ada peranan dan tanggungjawab yang mesti dilaksanakan dengan amanah yang dikurniakan ini seperti menunaikan zakat, berwaqaf serta bersedekah. Ia juga akan menjadi benteng daripada sifat tamak dan haloba sehingga sanggup melakukan apa sahaja bagi mendapatkan apa yang dikehendaki dengan cara yang haram, menindas, menipu dan sebagainya.

SIDANG JUMAAT YANG DIRAHMATI ALLAH

Mengakhiri khutbah jumaat pada hari ini, mimbar menyeru kepada seluruh umat islam supaya :

1. Umat Islam wajib berusaha membina kekayaan jiwa dengan memperbanyakkan memperingati Allah Taala untuk mencapai keredhaan-Nya didunia dan diakhirat.
2. Umat Islam mestilah mengikis sifat bakhil dan tamak haloba.
3. Umat Islam hendaklah mensyukuri kurniaan Allah SWT dengan memperbanyakkan amal soleh seperti bersedekah, berzakat, berwakaf dan memperteguh sifat Qanaah.

أَعُوذُ بِاللَّهِ مِنَ الشَّيْطَانِ الرَّجِيمِ
يَوْمَ لَا يَنْفَعُ مَالٌ وَلَا بَنُونَ إِلَّا مَنْ أَتَى اللَّهَ بِقَلْبٍ

سَلِيمٍ



"Hari yang padanya harta benda dan anak-pinak tidak dapat memberikan sebarang pertolongan. Kecuali orang-orang yang datang mengadap Allah dengan hati yang Selamat sejahtera dari syirik dan penyakit munafik".

(al-Syuara' : 88-89).

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ،
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ
هُوَ الْغَفُورُ الرَّحِيمُ.

Hafizul/Nurul
06.09.2017



KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا
شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى
آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ
الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ،
أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah SWT,

Mimbar Jumaat sekali lagi berpesan supaya kita sentiasa bertakwa kepada Allah SWT dan menyedari bahawa Islam mengajar kita supaya bersikap sederhana dalam segala amalan. Kita amatlah dituntut agar menampilkan kemuliaan akhlak, sikap dan keperibadian tinggi kerana Rasulullah SAW diutus untuk menyempurnakan akhlak dan sebagai rahmat bagi seluruh umat dan sekalian alam. Oleh itu marilah kita sentiasa memperbanyakkan solawat dan salam ke atas Nabi kita Muhammad SAW. Firman Allah SWT:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا.



اَللّٰهُمَّ صَلِّ وَسَلِّمْ عَلٰى سَيِّدِنَا وَمَوْلَانَا مُحَمَّدٍ سَيِّدِ
الرُّسُلَيْنِ وَارْضَ اللّٰهُمَّ عَنْ اَصْحَابِهِ وَقَرَابَتِهِ
وَأَزْوَاجِهِ وَذُرِّيَّاتِهِ أَجْمَعِينَ.

اَللّٰهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ الْاَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ
قَرِيبٌ مُّجِيبُ الدَّعَوَاتِ يَا قَاضِيَ الْحَاجَاتِ. اَللّٰهُمَّ
اعِزِّ الْاِسْلَامَ وَالْمُسْلِمِينَ، وَأَذِلَّ الشِّرْكَ وَالْمُشْرِكِينَ،
وَالْكُفْرَ وَالْكَافِرِينَ، وَالنِّفَاقَ وَالْمُنَافِقِينَ، وَالْيَهُودَ فِي
فَلَسْطَيْنِ. اَللّٰهُمَّ اَنْصُرْ اِخْوَانَنَا الْمُسْلِمِينَ
وَالْمُسْتَضْعَفِينَ فِي بОРМА، وَفِي فَلَسْطَيْنِ وَفِي
سُورِيَا وَفِي كُلِّ مَكَانٍ.

اَللّٰهُمَّ اِنَّا نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِينِ،
وَنَسْأَلُكَ بِاَسْمَائِكَ الْحُسْنٰى وَصِفَاتِكَ الْعُظْمٰى اَنْ
تَحْفَظَ بَعِيْنَ عِنَايَتِكَ الرَّبَّانِيَّةَ وَبِحِفْظِ وَقَايَتِكَ
الصِّمْدَانِيَّةَ، جَلَالَةَ مَلِكِنَا الْمُعْظَمِ سُلْطَانِ
سَلَاطُور، سُلْطَانِ شَرْفِ الدِّينِ اَدْرِيسِ شَاهِ الْحَاجِ
ابْنِ الْمَرْحُومِ سُلْطَانِ صَلَاحُ الدِّينِ عَبْدِ الْعَزِيزِ
شَاهِ الْحَاجِ. اَللّٰهُمَّ اَدِمِ الْعَوْنَ وَالْهِدَايَةَ وَالتَّوْفِيقَ،



وَالصِّحَّةَ وَالسَّلَامَةَ مِنْكَ، لَوْلِيَّ عَهْدٍ سَلَاعُورُ،
تَغْكُو أَمِيرَ شَاهِ ابْنِ السُّلْطَانِ شَرْفُ الدِّينِ اَدْرِيسِ
شَاهِ الْحَاجِّ فِي أَمْنٍ وَصَلَاحٍ وَعَافِيَةٍ بِمَنْكَ وَكَرَمِكَ
يَا ذَا الْجَلَالِ وَالْإِكْرَامِ. اَللّٰهُمَّ اَطْلُ عُمْرَهُمَا
مُصْلِحَيْنِ لِلْمُوظَّفَيْنِ وَالرَّعِيَّةِ وَالْبِلَادِ، وَبَلِّغْ
مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam, sebagai negeri yang maju, sejahtera dan berkebakikan dibawah naungan dan pimpinan raja kami sebagai ketua agama Islam di negeri ini.

Justeru kami pohon kehadiran-Mu ya Allah, tetapkanlah iman dan pegangan kami kepada Ahli Sunnah Wal-Jamaah, terimalah amalan soleh kami, suburkanlah jiwa kami dengan budi pekerti yang mulia, satukanlah hati-hati kami, kurniakanlah kami rezeki yang luas lagi barakah, kayakanlah kami dengan ilmu yang bermanfaat, lindungilah kami daripada bala bencana dan peliharalah kami daripada ajaran sesat seperti Syiah, Qadyani, dan lain-lain ajaran yang difatwakan menyeleweng dari ajaran Islam atau bertentangan dengan pegangan Ahli Sunnah Wal Jamaah. Ya Allah bukannya hati kami untuk mendirikan solat fardhu lima waktu, menunaikan zakat melalui Lembaga Zakat Selangor, mewakaf dan menginfakkan harta melalui Perbadanan Wakaf Selangor dan Tabung Amanah Pembangunan Islam Selangor.



رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ
ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩٠﴾
فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ
نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.
